



БЛАГОВЪСТНИК

РОЧНИК VI. * ЧИСЛО 10. * ОКТОБЕРЪ 1927.

ОТВЪЧАТЕЛЬНЫЙ РЕДАКТОР: О. ЕМИЛІЯН БОКШАЙ

СОДЕРЖАНИЕ:

Свѣдомо въ вѣру! — Де знайти правду? — Въ Оборонѣ вѣры. — „Православнымъ“ братямъ дасколько вопросовъ. — Сердце Іисуса,

помочь наша въ годинѣ смерти. — Изъ мисійного руху. — Новости. — Переписка редакції.

ВЫДАЕ ВЫДАВНИЦТВО ЧИНА СВ. ВАСИЛІЯ ВЕЛ. В УЖГОРОДЪ
ИЗ КНИГОПЕЧАТНІ ОО. ВАСИЛІЯН В УЖГОРОДЪ, УЛ. РАКОВЦЯ ЧИСЛО 54.

Выдавництво Чина св. Василія Великого въ Ужгородѣ

поручає слѣдуючъ книжки своего изданія:

Молитвенникъ для греко-каеолицкого русскаго народа.

Составилъ о. Петро Котовичъ ЧСВВ. стор. 507. Изд. II.

Содержаніе сеѧ книжки: Короткій катехизъ; Молитвы повседневніи; Молитвы утреніи, Молитвы вечерніи, Молитвы подчась Службы Божої, Приготовленіе до св. Сповѣди, Молитвы передъ и по Сповѣди, Молитвы передъ и по св. Причастію, Молитвы до пресв. Сердца Іисусового, Молитвы до Пречистої Дѣви Марії, Молитвы до святыхъ. Чинъ Утрени, Божественная Литургія, Чинъ Вечерни. Акафистъ до І. Христа, Акафистъ до Преч. Дѣвы Марії, Тропари воскресніи и повседневніи, Служба на всякое прошеніе, о усопшихъ, Тропари и Кондаки св. Четыредесятницы, Пятьдесятницы и всѣхъ праздниковъ декретальныхъ. Кроме сего е: Пѣснь на Рождество Христово, Пѣснь въ честь св. Троицы, Пѣснь въ честь Преч. Дѣвы и св. отца Николая, Пѣснь благодарственная, Календарь цѣлого року и Пасхалия.

Оправлений въ полотно стоитъ 7 Кч, съ почтовою засылкою 7·80 Кч.

Да святится Имя Твое. Молитвословъ для молодежи. Стор. 232.

Печатаный окремъшно русскими а окремъшно латин. буквами.

Содержаніе: Короткій катехизъ. Молитвы повседневніи, утренніи, вечерніи, подчась Службы Божої, передъ и по сповѣди, передъ и по св. Причастію, до Пресв. Сердца Іисуса. до Преч. Дѣвы Маріи и до св. Іосифа; Чинъ Вечерни, Утрени, Божественная Литургія, Тропари и Кондаки воскресни, на всякое прошеніе и о усопшихъ; Пѣснь на Рождество Христово, въ честь Пресв. Троицы, къ Пресв. Дѣву Марій и въ честь св. Отца Николая.

Оправлений коштує 4 Кч, зъ почтовою засылкою 4·60 Кч.

Молебень къ Святѣйшому Сердцу Іисуса и къ Пр. Дѣву Маріи.

Содержить кроме двохъ молебновъ, дасколько пѣсней къ Пресв. Сердцу Іисуса и Преч. Дѣву Маріи и Пѣснь благальну (супликацію). Печатана окремо русскими, а окремо латинскими буквами. Стор. 44. Стоитъ 80 гел., зъ почтою 1 Кч.

Найсвятѣйшое Сердце Спасителя. Коротка наука для членовъ общества Святѣйшаго Сердца Г. Іисуса Христа. Сторонъ 64.

Содержаніе: Исторія набожности до Пресв. Сердца Іисуса и ласки, которыя Іисусъ пріобѣнявъ почитателямъ Пресв. Сердца. Повинности для членовъ сего общества. Дасколько молитовъ къ Пресв. Сердцу Іисуса. Молебень къ Пресв. Сердцу Іисуса. Пѣсня благальная (супликація). Золота корунка къ П. С. Іисуса. Дасколько пѣсней къ П. С. Іисуса. Прочто почитаеме П. Сердце Іисуса? Печатана окремо русскою, а окремо латинською азбукою.

Стоитъ 1·50 Кч, съ почтовою засылкою 1·70 Кч.

Популярнѣ катехитичнѣ проповѣди для католицкого народа.

Часть I. Про вѣру. Часть II. Про надію и любовь. Кожда часть творить окрему книжку. Темы проповѣдей дуже актуальнѣ.

Цѣна по 20 Кч за одинъ прим., зъ почтою по 21·80 Кч.

Стойте въ вѣрѣ. Листъ I. Про походженя св. Духа отъ Отца и Сына, стор. 7. Листъ II. Оборона чести П. Дѣвы Маріи, стор. 7.

Цѣна обохъ брошуръ разомъ 60 гел., зъ почт. засылкою 80 гел.

БЛАГОВѢСТНИКЪ

ДУХОВНА ГАЗЕТА ДЛЯ ПОДКАРПАТСКИХЪ РУСИНОВЪ

Выходитъ 1-го кождого мѣсяца.

Адреса

Редакція, адміністрація и експедиція:
Видавництво Часописа Василія Великого
в Ужгородѣ, улица Раковци число 54.

Предплата:

Въ Республіцѣ на цѣлый рокъ 10 Кч.,
за границю 17 Кч. — До Америки 0·50 (новъ) дол.
Одно число „Благовѣстника“ стоить 1 Кч.

РОЧІІІКЪ VII.

ЧИСЛО 10.

ОКТОБЕРЬ 1927.

Свѣдомо въ вѣрѣ!

(Мѣсячное намѣреніе).

Даний Римляне не переслѣдовали лише одну христіянську релігію. Коли они завойовали якийсь народъ, перебрали и ихъ боги и поставили имъ храмы, статуї и почитали ихъ ровно зъ своimi богами. Такъ перебрали они боговъ грековъ, египтянъ, персовъ и пр. Одиноко Христова іштина не могла згодитися зъ вѣрою поганскою.

И зато, бо христіянска вѣра рѣшучо стоить на той основі: „да не будуть тѣкъ ініи Гози кромѣ мене“. Где Христосъ с Богомъ, тамъ не може быти Богомъ ни Юпитеръ, ни Магомедъ, ни другій ложный Богъ. Христіянинъ може поклонитися лише одному Богу, не може служити разомъ и мамонѣ и Христу. И зато выбухли переслѣдованія на христіянъ въ римской державѣ, бо христіяне не хотѣли приклонити головы передъ поганскими божками и не хотѣли имъ жертвы приносити.

Христіянска вѣра и теперь пожадає цѣлого чоловѣка. Хоче и требує, чтобы той христіянинъ передавъ себе цѣлкомъ Богови, пожадає, чтобы чоловѣкъ цѣлкомъ Богу единому служивъ, хоче чтобы въ житю христіянина на первомъ мѣстѣ бывъ Богъ. Христіянска вѣра не вдоволяєся тимъ, чтобы чоловѣкъ лише въ церкви бывъ христіяниномъ, але вымagaе одъ него, чтобы въ всѣхъ односинахъ справовався якъ свѣдомый, твердый христіянинъ.

Христіянинъ мае быти въ фамиліѣ. Мужъ христіянинъ мае дбати про то, чтобы въ хижѣ христіянской дѣти

порядочно молилися, ходили до церкви, чтобы были побожнѣ и держалися до законовъ Божихъ. Мати христіянска має выховати дѣтей въ побожности, дбати про то, чтобы въ недѣлю кождый членъ фамиліѣ (и слуга и служница) пошовъ въ Божій домъ. Она має научити дѣтей молитвы и мирковати на нихъ, чтобы не ходили грѣшными дорогами.

Окремъ церкви и фамиліѣ має христіянињ и инде дуже важнѣ повинности. Въ нынѣшнихъ часахъ все большу ролю играє въ житію народовъ політика. Політичнѣ партії посылають своихъ пословъ въ парламентъ, где ухвалюються законы державы. На жаль межи політичними партіями не однѣ суть такѣ, котрѣ суть непріятелями христіянскої вѣры; зновъ суть такѣ, котрѣ ничего не творяться зъ вѣрою. Такѣ партії легко могутъ принести такѣ законы, котрѣ дуже пошкодять нашої вѣрѣ. Поеднѣ політичнѣ партії (комуністы) выразно виступаютъ противъ вѣры и стараються цѣлковито знищити всяку христіянску вѣру. Они бы хотѣли завести такій порядокъ якъ въ Россіи, чтобы забрати церкви, прогнати священиковъ и изъ сердецъ народа выкоренити вѣру у Бога.

Но та діяволска цѣль до теперъ еще не здѣйстнилася. А не здѣйстнилася зато, бо въ парламентѣ суть і такѣ сильнѣ христіянскѣ партії, котрѣ рѣшучо противостоять симъ безбожнымъ домаганямъ и не допускають до ухваленя такихъ законовъ.

Се уже весь свѣтъ знає. Знаютъ люде, что свѣтъ уже роздѣлився на двѣ части. На вѣрниковъ Бога и на непріятельовъ Бога. Борьба межи двома таборами найострѣйше ведеся въ парламентѣ бо знаютъ, что якѣ законы будуть ухваленѣ, такий порядокъ буде въ державѣ.

И коли дѣло такѣстоить, ци може христіянињ задоволитися тимъ, чтобы бывъ лише въ церкви христіяниномъ? Ци згодиться зъ христіянскою вѣрою въ церкви на колѣнкахъ молитися а потомъ при выборахъ голосовати на комуністовъ, на найбóльшихъ вороговъ христіянства?! Ци не ганьба и соромъ видѣти такихъ женьщинъ, котрѣ кождого тыждня причащаються, а коли голосовати треба, листину комуністовъ держать въ рукахъ?!

Нѣть! Христіянска вѣра пожадає цѣлого чоловѣка!

Христіянина въ церкви, христіянина въ фамилії, христіянина и въ политицѣ и въ громадскомъ житію! Не можеме двомъ панамъ служити и Богови и мамонъ, и Христови и ворогамъ Христа! Руській народе, руській христіянине, если хочешь, чтобы твоѣ церкви стояли, если хочешь, чтобы туй христіянска вѣра пановала, будь свѣдомымъ, цѣльмъ христіяномъ, чтобы вороги Христа не могли зъ твоєю помочію знищiti на Подкарпатю Царство Христове!

Мѣсячное намѣреніе на октоберъ... чтобы вѣрники въ всѣхъ односинахъ житя справовалися, якъ правдивъ и свѣдомъ христіянѣ.

Де знайти правду?

Написавъ свящ.: ТЕОДОЗІЙ ЛЕЖОГУБСКІЙ.

(Продовження).

— А чому не выбравъ св. Петро Царгороду? — спитавъ хворий.

— Чому не выбравъ Царгороду, звѣдаете — сказавъ о. Петро. — Не выбравъ по просту тому, что Царгороду тогды еще зовсѣмъ не было. Была лише невелика осада, что называлася Византія. А впрочемъ гляньте на нынѣшній Царгородъ. Надъ нимъ пануе Турокъ, а царгородскому патріярхови навѣть не вольно бывати въ мѣстѣ, лишь на поганомъ передмѣстю Фанаріотъ. Христіянъ въ Царгородѣ называютъ Турки „псами“. Царгородскихъ патріярховъ выбирає турецкій султанъ, а коли они ему не до дяки, то скидае ихъ, не звѣдаючися про се никого.

— А въ якомъ пониженю жіють нынѣшній царгородскій патріярхи? Не лише невѣрнимъ султанамъ, але навѣть его везирамъ кланяються до землѣ, а не разъ и въ руки ихъ цѣлууть. Ажъ жаль бере, якъ згадається про тѣ часы, коли то на цѣлый свѣтъ свѣтила блескомъ царгородска Церковь. А теперъ видиться въ такомъ пониженю, что мимо волѣ знова пригадуються слова пророка Даніила про „мерзость запустѣнія!“

— Веденый св. Духомъ мусѣвъ св. Петро удалися тамъ, где ему назначивъ мѣсто самъ Богъ.

— Старозавѣтна святыня жидовска, котра была прообразомъ Христовоѣ Церкви, была такъ збудована, что входъ до неї бывъ изъ сонця, а найсвятѣйша єсть часть лежала на западъ. Кождый правовѣрный жидъ, коли молився, звертавъ свої очи на западъ, до „Свята Святыхъ!“

И на западъ звернувъ свої очи св. Петро. А тамъ на западѣ лишалося мѣсто, что было престольнымъ мѣстомъ цѣлої римскої державы, яка обоймала тогдашній свѣтъ.

— Тамъ звернувъ свої кроки бѣдный рыбакъ галилейского озера. Страхъ переймавъ его, коли тамъ ишовъ. Что онъ тамъ уде? Кто его тамъ слухати буде? Тамъ римскъ цѣсары, что величали себе богами, тамъ гордъ патриціѣ, что каждого, кто не бывъ патриціемъ, уважали нечоловѣкомъ, тамъ поганскѣ философы дойшли до того, что существованіе боговъ уважали байкою, тамъ поганскѣ жрецѣ, что приносять жертвы богамъ, въ которыхъ не вѣрили. Та непоборима сила Божа казала св. Петрови ити у се гнѣздо розпусты та грѣха, чтобы дати неизбитый доказъ силы Христовоѣ науки, которая перетворила жерело грѣха въ жерело Божоѣ ласки. Мѣстомъ тымъ, бывъ Римъ.

Св. Петро першій епископъ Риму.

Тамъ, въ Римѣ, по свѣдоцтвамъ найдавнѣйшихъ историковъ, а навѣть вороговъ Церкви, основавъ св. Петро епископску катедру и бывъ черезъ 25 лѣтъ епископомъ, а заразомъ першимъ головою Церкви.

Сучасний св. Петрови, жидовскій историкъ Філонъ, выразно пише, что св. Петро бывъ въ Римѣ. Такъ само пише старинный историкъ Евсевій: „Петро въ Римѣ всенародно проповѣдовавъ Боже слово“. Св. Тарасій, царгородскій патріярхъ, въ свое мъ письмѣ до папы Адріяна II-го, пише: „Божественный апостоль Петро, кого престолъ Ви (Адріянъ II.) займає“. Св. Іоанъ Дамаскинъ называє св. Петра першимъ епископомъ Риму. А такожъ и россійска церковь признає св. Дамаскина святымъ и спѣває при Богослуженяхъ его чудовѣ пѣсаѣ.

— Въ Четь Минеѣ, якоѣ и Вы въ россійской Церкви уживаете при Богослуженї, подъ днемъ 29. юнія читаеме, что св. Петро передъ своею смертію, (на просьбу христіянъ, что боялися даже о житіе головы Церкви) хотѣвъ опустити Римъ, где якъ разъ лютилося страшне переслѣданіе христіянъ за цѣсара Нерона, але самъ Спаситель явився ему на дорозѣ. Св. Петро запитавъ Спасителя: „Господи, камо грядеши? (Господи, куды идешъ?) На се одповѣвъ ему Христосъ: „Иду до Риму, чтобы датися розпятии другій разъ“. Сесь слова были причиною, что св. Петро вернувъ до Риму, чтобы пролити свою кровь за Христа. Се и сталося 29-го юнія, коли св. Петро розпятый на крестѣ стрѣмголовъ отдавъ Богу душу. На томъ мѣстѣ где явився Іисусъ Христосъ св. Петрови, стоить до нынѣ церковь, яка называється: „Камо грядеши“.

— Въ Четь-Минеѣ, на день 4 го януаря читаеме, что св. Линъ бывъ епископомъ въ Римѣ по смерти св. Петра, а на день 29-го юнія, что самъ св. Петро высвятивъ его на епископа. Такъ само читаеме такожъ, что св. Петро и Павло понесли мученическу смерть того самого дня, 29-го юнія 67. р. по Христѣ.

Папа римський — видимий голова Церкви.

— Вчера была у мене Ваша панѣ-матка, — говоривъ хворый.
— Принесла менѣ малинового соку до воды та розпиговала про

рану. Дала менъ такожъ книжку до читаня: „Фабіоля“. Я се читавъ до повночи. Якій то жаръ любови бывъ тогды въ Христової Церкви. А теперь? Теперь сваряться христіяне межи собою, а сатана-врагъ тѣшиться. Пропаде Христова Церковь, пропаде Божа правда на земли.

— Нѣ! Не пропаде — перервавъ о. Петро. — Не переможе сатана Божоѣ правды, не зможе Христовоѣ Церкви, бо зъ нею Христосъ „по вся дни до скончанія вѣка“, бо она основана на скалѣ Петра, бо на еї чолѣ стоить Христовий намѣстникъ папа римскій.

— Вы згадали про папу римского — замѣтивъ хворый. — Оно правда, что Христосъ установивъ св. Петра Головою Церкви та что св. Петро бывъ першимъ епископомъ мѣста Риму, але видите, я якось не можу зрозумѣти, про что гр. каѳолики уважаютъ папу римскаго головою Церкви? Тадъ головою Церкви есть Христосъ. Онъ є основавъ, онъ обѣцявъ быти зъ нею до конца свѣта. А вы, гр. каѳолики, нс хотете мати головою Христа, а только чоловѣка та еще и кажете, что сей чоловѣкъ есть святый и не може николи згрѣшити, бо называете его непогрѣшимымъ. Хиба есть такій чоловѣкъ, чтобы не грѣшивъ?

Кто есть головою Церкви?

— Ось въ томъ и бѣда, что вы думаете, что мы гр. каѳолики, не хотеме мати Христа головою Церкви та вѣриме, что папа есть святый и не може згрѣшити — сказавъ о. Петро. — А я вамъ кажу, что вы думаете цѣлкомъ ложно та посуджуete насъ, о такѣ рѣчи, про якѣ намъ навѣть не снилося.

— Ми, гр. каѳолики, вѣриме, что Христосъ есть головою Церкви, только онъ головою такимъ, якого не можна видѣти, невидимымъ, а св. Петро и его наслѣдники папы римскѣ, суть заступниками Христа, его намѣстниками иproto, видимымъ головою Церкви.

— Оно чтось подобно, якъ въ державѣ. Царь ци цѣсарь, есть головою державы, а въ кождомъ большомъ краю есть его заступникъ, якъ мы кажеме, намѣстникъ, что выконуе власть въ имени цѣсара. Такъ подобно устроивъ Іисусъ Христосъ и свою Церковь.

— Христова Церковь есть видимымъ зборомъ вѣрныхъ и якъ видимый зборъ, мусить мати такожъ видимого голову, такъ якъ видиме людске тѣло має такожъ видиму голову. Як довго стоить домъ, потребуе подвалинъ, якъ довго есть стадо, потребуе пастыря. Церковь то домъ и стадо Христове. Она має истинувати до конця свѣта, то до конца свѣта мусить мати голову. Симъ видимымъ головою есть папа римскій. А есть онъ нимъ не зато, что такъ хотять католики, не зато, что такъ хотѣли епископы мѣста Риму, а зато, что такъ хотѣвъ Іисусъ Христосъ. Тадъ Іисусъ Христосъ основавъ Церковь, чтобы она вела людей до вѣчного спасенія и то всѣхъ, якъ будуть до конца свѣта. Коли Христосъ хотѣвъ, якъ я се розказовавъ вамъ давнѣйше, чтобы Его Церковь мала свого видимого го-

лову въ особѣ св. Петра, то цѣлкомъ зрозумѣло, что мусѣвъ хотѣти, чтобы по смерти св. Петра, Церковь не лишилася безъ видимого головы, а чтобы власть, яку давъ св. Петрови, т. е. „пости“, перейшла на когось иного, а по смерти того, знова на его наслѣдника и такъ ажъ до конца свѣта.

— Теперѣшнѣ христіяне суть такожъ „овцями та ягнятами“ Христа и коли Христосъ хотѣвъ, чтобы вѣрнѣ, якѣ жили за Его часовъ, мали видимого пастыря-голову, то мусѣвъ хотѣти, чтобы и теперѣшнѣ Его вѣрники, мали такожъ видимого пастыря-голову.

— Если бывъ потрѣбный видимый голова тогды, коли то, якъ самъ кажете, у христіянъ бывъ такій жаръ любви до Христа та до Его науки, то о сколько больше потрѣбно такого головы и въ позднѣйшихъ часахъ, коли той жаръ остигъ, коли „ягната“ а навѣть и „овцѣ“, стали забѣгати на манивицѣ.

— Наколи бывъ потрѣбный видимый голова для тыхъ христіянъ, якѣ еще властными очима видѣли Христа та Его чуда и властными уshima чули Его науку, то о сколько больше потрѣбный онъ тогды, коли живе поколїня, яке не видѣло Христа, а Его науку знає только одъ другихъ?

— Сего домагається простий розумъ, на се не потрѣбно заглядати до св. письма.

— Кто есть тимъ, что по св. Петри зоставъ видимымъ головою Церкви? А кто есть намѣстникомъ цѣсара, по смерти давнаго намѣстника? Сей, что слѣдує по немъ. Такъ и въ Христовой Церкви. Сей мусѣвъ быти видимымъ головою Церкви, что бывъ наслѣдникомъ св. Петра, значиться сей, кто бывъ епископомъ мѣста Риму, де св. Петро понѣсь мученическу смерть. И такъ дѣйстно было. По св. Петри слѣдовавъ св. Линъ, потому св. Анаклетъ, а по немъ св. Климентій.

— Загляньте у вашѣ богослужебнѣ книги, загляньте до Четь-Минеѣ. Тамъ вычитаете подъ днемъ 29-го юнія, что св. Петро высвятивъ св. Лина на епископа Риму.

— Тыхъ наслѣдниковъ св. Петра признавала цѣла Церковь своими видимими головами.

Что кажутъ Отцы Церкви?

— Не хочу васъ томити наводженіемъ словъ отцовъ Церкви, бо и изъ словъ тыхъ, что я ихъ наводивъ давнѣйше, уже выходить ясна правда, але згадаю еще про св. Иринея, якого и россійска Церковь признає Святымъ. Онъ родився въ Малой Азїѣ, бывъ Грекомъ и ученикомъ св. Поликарпа, ученика св. Іоана Евангелиста. Сей Отець Церкви каже, что про то, „что римска Церковь перевысіла усѣ Церкви своимъ головствомъ, зъ давенъ-давна удавалися до неѣ всѣ, что хотѣли полагодити своѣ вѣроисповѣднѣ непорозумѣнїя“. Св. Ириней каже: „Зъ давенъ-давна“, а онъ самъ понѣсь мученическу смерть въ р. 202. по Хр., значиться, уже давно передъ тымъ, ишѣ Церкви зверталися въ справахъ вѣры до римскої Церквиproto, что єсть епископъ бывъ головою Церкви.

— Той самъ Ириней каже, что только въ одной римской Церкви можно вычислiti всѣхъ епископовъ, починаючи одъ св. Петра и вычислюе ихъ ажъ до своихъ часовъ. Чому не може сего зробити въ іншихъ мѣстахъ? Чому не можно вычислiti епископовъ Іерусалима? Видно, что римска Церковь была всѣмъ звѣстна и всѣ вѣрники знали кто и коли есть єѣ настоятелемъ, а зналиproto, что настоятелей римскої Церкви признавали видими головами Церкви. А нынѣ, ци не такъ само? Ци есть на свѣтѣ хотя оденъ, яко-тако образованый чоловѣкъ, чтобы не знати, кто есть епископомъ Риму? А колько есть такихъ, что знаютъ, якъ называesя спискopъ Петербурга, або Царгорода?

— Св. Ігнатій Богоносець, ученикъ св. Петра и Іоана, епископъ антіохийскій (про якого оповѣдають, что онъ бывъ тою дѣтиною, яку Іисусъ Христосъ взявъ на руки и поблагословивъ), въ свое мъ посланію до Римлянъ называе римску Церковь предсѣдателькою, т. е. головою всѣхъ Церквей.

(Продовження слѣдуе.)

ВЪ ОБОРОНѣ ВѢРЫ.

Сколько ихъ е? Отступники изъ „Русскої Землѣ“ разъ уразъ хваляться и розголошуютъ межи своими приверженцями, что ихъ, нѣбыто „православныхъ“ больше есть якъ „проклятыхъ“ уніатовъ. — Та не треба дивоватися имъ, бо Фотіянцѣ не знаютъ іншакъ боротися, якъ лишь брехнею. По правдѣ же дѣло маesя сякъ: Ученый монахъ Венедиктинець обчисливъ, что на свѣтѣ живе теперь около 1816 milіоновъ всѣхъ людей. Въ томъ числѣ е крещеныхъ 684 mil. и 1132 milіоны нехристовъ. Межи христіянами е сыновъ единоѣ святоѣ, соборноѣ (каѳолическої), апостольскої Церкви такъ восточныхъ якъ и латинского обряда понадъ 320 milіоновъ, протестантовъ лутровъ, кальвиновъ, реформаторовъ, англикановъ и др. около 210 milіоновъ и 144 milіоны схизматиковъ, котрѣ называють себе православными. З'единеныхъ отже, се е уніатовъ, есть больше якъ два разы столько, сколько московскихъ, румынскихъ, сербскихъ болгарскихъ, грекихъ и всѣхъ другихъ схизматиковъ разомъ. — Та нашъ отступники и ихъ агитаторы изъ „Русской Землѣ“ все вговорюють въ нашего Русина, якъ въ жыда хвороту, что ихъ больше, бо держаться сего, что треба или за большинствомъ. Дуже одначе ошибаються. Бо у дѣлахъ вѣры не на се треба позирати де большинство, але де правда, де Христосъ, де спасеніе. Поганыхъ нехристовъ есть еще на свѣтѣ больше якъ крещеныхъ, бо чось ажъ 1132 milіоны, а господа изъ „Русскої Землѣ“ не дуже до нихъ пилують. Тоже буддистовъ, гиндусовъ, и исповѣдниковъ Конфуція есть больше якъ „православныхъ“, але до нихъ они не пристають. Памятай же, брате солодкій и сестро во Христѣ, что тамъ спасеніе вѣч-

ное, де Христосъ Господь, Его свята правда и благодать. А они лишь во „единой, святой, соборной (каѳолической) и апостольской Церкви“, а не у Фотинцовъ, хотяй бы ихъ было и незнати сколько!

Фарисейство батюховъ. Читаеме часто у схизматицкихъ новинкахъ, что въ Изѣ, Густѣ, ци Тереблѣ буде великий отпустъ, а на нихъ запрошують приверженцовъ своихъ, чтобы ишли на съ отпусты. Но во тыхъ же самыхъ новинкахъ нападаютъ схизматицкѣ учень изъ буштинскоѣ академіѣ на св. Церковь Христову каѳолическу, что она выдумала отпусты, хотяй сякоѣ власти надавати отпусты Церковь не мае. Якъ се погодити одно зъ другимъ? Кажуть они, что въ Церкви отпустовъ не можъ доступити, а своихъ присташовъ кличутъ на отпусы до себе.

Най самъ ихъ учень богословы, котрѣ выйшли изъ фабрики батюховъ въ Буштинѣ дадуть на се отвѣтъ! — Я тебѣ, солодкій брате, скажу лишь сесе, что кто признае, что Церковь свята мае власть отпускати грѣхи, ссї мусить такожъ признати власть Церкви надавати вѣрнымъ отпусты. На самъ першій Великденъ вечеромъ сказавъ Господь Іисусъ до Апостоловъ: „Прїимите Духъ свѧтъ: Імже ѿпустите грѣхи, ѿтпустлѧтсѧ Імѧ: и Імже держите держатсѧ“. (Іо. 20. 22—23). Сими словами надавъ Іисусъ Христосъ своеї Церкви власть отпускати грѣхи и то у цѣлой розтягlosti. Каждый же грѣхъ лишае на душѣ два слѣды, двоякое зло: провину за образу Бога, а и кару за нарушеніе Божого права и кривду Г. Богу заподѣяну. Грѣхъ отстане вповнѣ одъ душѣ, коли чоловѣкъ за провину покаєся и Бога перепросить (се мае мѣсто при св. Сповѣди, коли кто сповнивъ тяжкій грѣхъ), а кару, затягнену на себе грѣхомъ одпокутуе. Церковь свята мае власть отпускати въ имени Божомъ каючомуся „грѣхъ“ се е не лишь провину, але и кару за грѣхъ не лишь вѣчну, але и дочасну. Вѣчну кару отпускає лишь у св. Сповѣди, дочасну тоже и поза св. Сповѣдею надаючи за сповненія даякихъ добрыхъ учинковъ якъ: молитва, постъ, милостыня, посвѣщенія Церкви, отпусты повнѣ або частнѣ. Та схизматицкѣ баламуты розумѣютъся на богословію якъ вовкъ на звѣздахъ и тому разомъ зъ кальвинами, котрѣ отвергли св. Сповѣдь, и собѣ заперечують власть дану Церкви надавати вѣрнымъ отпусты. Сеъ однакъ власти Церкви святой никто не отбере, и она буде еї употребляти на спасеніе своихъ вѣрниковъ!

(Кефа).

„Православ.“ братямъ дасколько вопросовъ.

Передомною двѣ летючки п. з. „Благословеніе православного прихода въ Межилаборцахъ“, печатанѣ у Вел. Свиднику отже подъ окомъ правосл. архимандрита Виталія. Обѣ съ брошуръ своимъ содержаніемъ поганѣ; они метають недобroe свѣтло на „православныхъ“ агитаторовъ и ихъ покровителей. Авторъ сихъ брошуръ выливае цѣлый цеберь помый и безочливыхъ клеветъ на

видиму Голову единоѣ, святоѣ, соборноѣ и апостольскоѣ Церкви Христовоѣ, Римского Отця. — Привыкли мы вже до сякихъ клеветь, но въ семъ случаю не можеме мовчати, а поставиме „православному“ апостолови дасколько вопросовъ и просиме его эъ любовію дати намъ искренний и правдивый отвѣтъ.

1. Пишете въ своей брошурѣ, что мы гр. каѳолики „поставили Папу вмѣсто Бога“ и что Папу голосиме „вице-богомъ“. Коли вы и отъ кого чули, что гр. каѳолики учать, что Римскій Папа е „вице-Богъ“?! Нѣкто изъ каѳоликовъ и николи и нигде не учивъ, и не учить, что Папа е „вице-богъ“, что его якъ Бога треба честовать и вѣрити!! И самъ Папа и всѣ вѣруючѣ и розумнѣ дѣти св. Церкви Христової знаютъ, что римскій папа с лишь человѣкомъ, е смертнымъ сотвореніемъ, и слугою Божимъ, але мы тоже знаеме, что изъ установы Господа Іисуса кождочасный Папа е наслѣдникомъ св. Петра, верховного Апостола, и видимымъ начальникомъ, паstryремъ цѣлого вѣруючого Христового стада туй на земли. А се ачай не то самое, что „вице-богъ“, або что мы „поставили его вмѣсто Бога“, бо никто изъ гр. каѳоликовъ Бога не усувае и не отрекається, а навпаки якразъ римскѣ Папы по всѣ часы учать насъ Бога небесного и его св. Законъ честовать и держатися и якъ видимѣ паstryрѣ хоронять Христовое стадо отъ безвѣрія, безбожности, грѣха и загибели вѣчної. — Чому же свѣдомо пишетѣ брехню?!

2. Вы мудруете, что Господь Іисусъ е Богомъ, а „Богу вездѣ-сущему, всемогущему не нужно ни намѣстниковъ, ни вице-боговъ“. — Видавъ авторъ летючикъ по пяному писавъ съ слова, бо по тверезому сякоѣ дурноты никто не то что не напише, але и не подумае. — Якъ „Богу не нужно намѣстника“, то на что ему епископовъ и священниковъ, абы людей учити Божоѣ правды и ихъ освячовати во св. Тайнахъ? Тажъ и они Божѣ высланники, послы, намѣстники! На что же тогда Соборовъ? Тадъ и Соборы въ имени и властію Бога насть учать и выдають законы! Куда же заведе васъ сяка плутаница?!

Не забывать намъ, что не во семъ дѣло, ци Богу нужно намѣстника, ци нѣть, но въ семъ дѣлѣ то рѣшае, что Господь Іисусъ такъ зарядивъ, абы св. Петро и его наслѣдники римскѣ епископы управляли и рядили цѣлое словесное стадо Христове. И се святое! Ци оно нужно ци не нужно, не нашое дѣло судити. Намъ треба повиноватися установѣ Господа Іисуса ци она намъ во смакъ ци нѣть. Може быти, что дакому больше усмѣхаються совѣты, захваливанѣ въ згаданой брошурѣ, но се не може змѣнити установы Христової. Ци люди се признають, ци нѣть, то римскій Отець есть и буде видимымъ Головою Церкви Христової, и неомильнымъ учителемъ правды Божоѣ и найвысшимъ паstryремъ Христового стада! Каѳолики знаютъ се добре и исповѣдують, что Іисусъ Христосъ есть по всѣ вѣки основателемъ и фундаментомъ своеї Церкви, але знаютъ они и се, что видимое стадо Христовое на земли потребує видимого Паstryря и видимого неомильного учителя, котрый бы по всѣ часы провадивъ, боронивъ

и учивъ словомъ правды Христовыхъ вѣрниковъ. Христова Церковь на земли мае быти одна, наука въ ней тоже мусить быти одна по всѣхъ усюдахъ, а се якразъ здѣйстнєеся черезъ одного видимого Голову, и Пастыря и Учителя, римского Папу.

Покажѣть, будьте ласкавѣ, де у православію єдность. Православнѣ розбитѣ якъ горнецъ. Не е єдности межи московскими православными и греческими або украинскими. Православнѣ въ Булгаріѣ ворогують зъ православными въ Сербіѣ. А яка єдность межи православными въ межахъ нашей Республики, то красше и не згадовати. Гораздъ и Савватій, Виталій и Кабалюкъ (якъ и митрополитъ Антоній и Євлогій), вадяться межи собою! У всѣхъ нихъ Христосъ єдинимъ невидимымъ головою Церкви, але однѣ тягнуть до лѣса, другѣ до бѣса, бо не е у „православныхъ“ одного видимого пастыря и Головы! Одно, что з'единяе „православныхъ“ се на жаль слѣпа ненависть до единобъ, святоѣ, соборноѣ, апостольскоѣ Церкви и еѣ видимого головы римского Папы!

3. Пишете, что гр. каѳ. учатъ: „будьто бы папа не можетъ грѣшити“. Скажѣть намъ, просиме васъ дуже красно и по братськи, кто изъ каѳоликовъ або котрый папа такое коли говоривъ?! Едина, свята, соборна (каѳолическа), апостольска Церковь згодно зъ правою учить, что римскій Папа не може помилитися, коли въ дѣлахъ вѣры и обычайовъ оголошує науку для цѣлоби Церкви! Але никто изъ каѳоликовъ и нигде и николи не учивъ, что „папа не можетъ грѣшити“, якъ се вы важитеся писати. Чи не ганьбитеся свѣдомоѣ клеветы?! Тажъ брехня дитиною діявола! Свѣдомо метати клеветою, се грѣхъ передъ Богомъ небеснымъ!

4. Пишете тоже что папами были „возведши обманомъ на папскій престолъ женщины“. Будьте ласкавѣ сказать, коли се было и кто были сѣ женщины. — Если сего ни вы ни никто на свѣтѣ не годенъ доказати, такъ чому же свѣдомо пишете брехню? Ци се пливе изъ любови до правды, которой маеме всѣ служити?

5. Звете тоже римскихъ папъ „разбойниками“. На се вамъ скажеме лишь одно. Нынѣшний св. Отецъ, Пій XI., больше якъ 100 міліоновъ лиръ давъ на голодуючихъ православныхъ въ Россіи и на Українѣ, а сотки тысячи лиръ роздавъ московскимъ православнимъ емігрантамъ, хотяй знае онъ добрѣ, что колись (тому 100 и 50 лѣтъ) „православнѣ“ Москаль тисячъ нашихъ греко-каѳолическихъ руськихъ церквей загарбали силою на Подолю, Волынѣ, Холмщинѣ и Подляшу, хотяй знае что они невинно гонили, мучили и проливали кровъ вѣрнихъ сыновъ св. каѳолическоѣ Церкви. Чому же называете римскихъ папъ „разбойниками“ и „антихристами“. Не добро у вашомъ сердцю, бо „шізыкъ сърдца обуста глаголють“ — каже Господь.

6. А уже цѣлкомъ не лицюе вамъ, ширителямъ св. „православія“ спѣвати славословіе въ честь „гуситовъ, лутерановъ, англикановъ, кальвіністовъ и др.“ — Кождий вѣруючій и честный „пра-

вославный“ буде ганьбитися за васъ, что вы посмѣли явно хвалити еретиковъ, котръ одну по другой одкидають правды, гошошенѣ право-славною Церквою, котръ отже и для васъ якъ „истинно православ-ныхъ“ повиннѣ быти святѣ и ненарушимѣ. Если же вы важитеся сихъ еретиковъ хвалити, то знакъ, что вы видавъ недалеко отъ нихъ, что и васъ треба причислити до сякоѣ честноѣ компанії. Сяке цимбор-ство никому чести не приносить, але вкрывае соромомъ и ганьбою!

Если е отже у васъ еще мало правдолюбности и чести, такъ чимъ скорше одкличте киненѣ клеветы на гр. каѳоликовъ и больше ихъ николи не разсѣвайте! Будьме братя, по правдѣ слугами Христа, Божоѣ правды, а не пекельного брехуна и отца ложи! Богъ не-бесный видить всѣ нашѣ дѣла и цѣлое сердце наше! [Правдолюбъ].

Сердце Іисуса, помочь наша въ годинѣ смерти.

(Оповѣданя).

Якъ на быстрыхъ крылахъ летѣвъ, краявъ великѣ просторы синього моря корабель, что ъхавъ зъ Нового Йорку, везучи велику рожнородность подорожныхъ. Было тамъ богато т. зв. туристовъ та дипломатовъ, купцовъ; не мало было тамъ бѣдныхъ переселенцовъ, якъ шукаючи за хлѣбомъ насущнымъ, ъхали до Канады на паровику.

Море было спокойне, вѣтеръ утихъ, а сонце тонуло въ черве-ныхъ хвиляхъ моря. Покладъ, де мѣстився сальонъ першоѣ класы, бывъ наповненый панами тай дамами. Сидячи на выгодныхъ крѣслахъ, проходжуючися приивлялися прекрасному явищу — заходу сонця на морѣ.

На разъ, середъ тօ чудовоѣ хвилѣ почувся плачъ хлопчика и грубый голосъ матроза:

— Забирайся, волоцюго, не знаешь, что сюды невольно хо-дити? Все такъ малѣ емigrанты... Иди отсюди, кажу тебѣ.

Деякъ изъ подорожныхъ звернулися въ ту сторону и увидѣли малого виновника, кто переполошеный утѣкавъ помежи лавками, что-бы сковатися одѣ сурового моряка. Але одень англійскій священикъ утихомиривъ службового, застановивъ малого и взявши за ручку старався успокоити тай выпытовався его любезно.

Якъ достався онъ сюды до частины аристократичноѣ корабля? Хлопчикъ самъ не знатъ... Знавъ лишь, что мати одѣ колькохъ дней дуже хвора, что отецъ николи не выходить изъ еѣ кабини. Онъ має 5 або 6 роковъ. Нынѣ пополудни знутивши сидѣти въ тѣсной ка-бинѣ, коли отецъ и мати здавалися что заснули, онъ выхопився.

Священикъ, кто зъ цѣкавостю слухавъ оповѣданя малого, за-пытався его вконци:

— Ци поведешь мене до мамы? Я маю чтось сказать ей.

Хлопчикъ поднявъ оченята, въ якихъ еще тремтѣли слезы, гля-нувши на священика, якбы зъ зачарованьемъ и звѣданьомъ. Але усмѣхъ того „пана“ бывъ такъ солодкій, выглядѣть такъ отцевскій,

что безъ одповѣди рушився зъ мѣсця и тrimaючи руку своего покровителя, повѣвъ его до одѣлу выселенївъ.

* * *

Въ тѣсной кабинѣ лежача хвора женщина была непритомна, въ горячцѣ. Коло хвороѣ сидѣла старша донька и обтырала высохле лице матери, та затримовала руки, порушованѣ въ непритомности. Мужъ, прибитый горемъ, не зная куды звернутися, где знайти помочь въ своемъ несчастю.

Худобна жона одъ пару годинъ середъ своихъ невздержаныхъ терпѣнь просила благословленія священика. Але на жаль межи подорожными З-оѣ класы не было такого, анѣ служба не могла дати нѣякоѣ информаціѣ.

Малый образець Сердца Іисуса, что донька знайшла въ еѣ молитвенику, бывъ единою утѣхою въ боляхъ конаня.

Въ томъ ввойшовъ хлопчикъ въ товариствѣ незнаного гостя, кто приязно поздоровкався и на видъ образка сказавъ до мужа, что вже вставъ на ноги:

— Вы безъ сумнѣву есте каѳолики. Я е священикомъ; хлопчикъ вашъ сказавъ менѣ, что мати тяжко хвора и я прийшовъ сюды, чтобы удѣлити еѣ благословеніе Господа.

Приблизився до постели, пробовавъ сказати дасколько словъ, але хвора не давала ниякихъ знаковъ, что розумѣе! Ци можливе было, чтобы Божое Провидѣніе приспало его запоздно? Выйшовъ на корытарь и наказавъ служачому закликати лѣкаря. Сей справдѣ появився сейчасъ, асе лишь на то, чтобы заявити, что онъ уже не е въ силѣ помогти. Тогда священикъ звернувся до мужа и доньки зъ святыми словами потѣхи, якѣ лишь вѣра дати може. Самъ выйшовъ принести свой часословъ, чтобы одмовити хотяй молитвы за умирающихъ.

Образъ на постели хвороѣ говоривъ своимъ милымъ усмѣхомъ про прощеня, про любовь, про безконечное милосердіе...

* * *

Повночь минула. Бѣдна женщина безчувственна, въ безсилію дыхала тяжко, въ присутности мужа и доньки, когта поддержовала еѣ голову; хлопець ставъ у ногъ постели. Священикъ, кто не хотѣвъ покинути ихъ, молився. На разъ, несподѣвано, умираюча отворила очи, обернулася довкола и пробовала познати особы и рѣчи. Тодѣ мужъ и донька зворушенѣ солодко промовили до неѣ, повѣдомляючи про присутность священика, якого она такъ ожидала. Лице жѣнки прояснилося блескомъ радости и зробила знакъ, что хоче зъ нымъ говорити, выявила горячое желанїя принятии св. Напутіе.

Священикъ при першихъ лучахъ ранноѣ зорѣ одправивъ Службу Божу. Ввойшовъ до бѣдноѣ кабини несучи завдатокъ вѣчного житя той душѣ, что мала велику набожность до Сердца Іисусового. Іисусъ бо сказавъ до ученицѣ свого Сердца, св. Маргареты Маріи Алакокъ: „Всѣмъ тымъ, что девять мѣсяцей за собою слѣдуючихъ будуть причащаїся въ першу пятницю мѣсяця, я обѣцюю ласку оста-

точного покаянія. Они не умрутъ въ моей неласці, але пріймуть СС. Тайны, а мое Сердце буде безпечнымъ захистомъ въ ихъ тривожныхъ хвиляхъ смерти". — Жона, котра за пару годинъ одала свою душу Творцеви была върною въ приниманю св. Причастія черезъ усть першъ пятницу мъсяця и Іисусъ Христосъ свою обѣтницю сповнивъ.

Най буде любленое и прославленое безконечно милосердное Сердце Іисусовое! А наша вдячность най буде велика и тревала!

Изъ италійского. — Надѣя.

ИЗЪ МИСІЙНОГО РУХУ.

Св. Миссія въ Синевѣрѣ. Въ дняхъ одъ 30-го юлія, до 7-го августа с. г. кончилася на Мараморошской Верховинѣ въ Нижнемъ Синевѣрѣ св. миссія. Проводили еї монахи Василіяны оо. Єофанъ и Стефанъ при ласкавой помочи Впр. о. Василія Ларя, пароха изъ Вышнихъ Верещихъ. Бѣдна ся наша Верховина. Страшнѣ бурѣ перейшли понадъ нею въ послѣднихъ лѣтахъ и спричинили тамъ велику руину. Несовѣстнѣ большевицко-схизматицкѣ агитаторы вложили нашимъ верховинцямъ братоубійче оружіе и пустили брата на брата. Красше и не згадовати за всѣ сесѣ безправства и беззаконія. Но наступило зъ часомъ отверезѣня, опамятаня. Вѣрнѣ сыни единої, святої, соборної (каѳолическої), апостольскої Церкви Христової дочекалися спокойныхъ хвиль, а и одступники почули въ сердци ганьбу и соромъ зачерезъ своїхъ нехристіянскѣхъ учинки. Наставъ часъ на ново зорати нивку людскихъ сердецъ и насеѧти здорового зерна Божої правды, котре зродилобыся плодами розкаяння, наверненя и поправы житія. Се сталося черезъ св. миссію. Черезъ цѣлый тиждень рано и вечеромъ голосилися въ просторій, прекрасной Церкви синевѣрской проповѣди. Въ день св. Ілії и на послѣдний день миссії зойшлася до Синевѣра цѣла тамошня Верховина: Колочава, Негровець, Горбъ, Лазы, Воловое, Поляна у такомъ числѣ, что величезна Церковь не годна была всѣхъ помѣстити. Не одно изъ заблудшихъ упознадо путь Божій и навернулося до Бога небесного. Изъ слезами въ очахъ и жалемъ въ сердци пращали добрѣ вѣрники изъ своимъ молодымъ душпаstryромъ отцовъ миссіонаровъ благаючи ихъ, абы небавомъ знова заглянули зъ словомъ Божимъ у ихъ високѣ горы. Бѣднѣ нашѣ Верховинцѣ и хлѣба у нихъ обмаль, та сердце у нихъ доброе, гнучкое, податливое подъ Божій посѣвъ. На жаль на цѣлу тамошню околицу заледви двохъ священниковъ, котрѣ мимо всѣхъ з'усиль не годнѣ заспокоити пекучихъ потребъ повѣреного собѣ стада и одганяти вовковъ, что прійшли до нихъ у кожъ батюховъ-отступниковъ и розрывають Христовоє стадо. По правдѣ „жатка мінога, дѣлателей же мало“. (Мат. 9.) Просѣмъ Господа, чтобы пославъ ревныхъ душпаstryрей на свою запущену нивку!

Реколекції для учительовъ. Въ духовной семинарії въ Ужгородѣ кончалися въ дняхъ одъ 15—19. авгуаста с. г. духовнѣ вправы

(реколекціѣ) для руськихъ учительовъ. Устроило ихъ Товариство св. Іосафата. Хотя многъ учитель на жаль поздно уже дозналися про реколекціѣ, то все таки якъ на початокъ собралися ихъ красное число. На даякѣ науки въ свободныхъ годинахъ приходили и учительки, котрѣ въ томъ часѣ были въ Ужгородѣ на окремомъ курсѣ. Наукъ выголошено десять, въ которыхъ порушено важнѣйшѣ, актуальнѣ вопросы нашего религійного и культурно-народного житія. Обновленїе духомъ лишили участники реколекції Ужгородѣ выскажуючи горячое желаніе, чтобы Товариство св. Іосафата кожного рока въ часѣ вакаціѣ устроило сякій духовный пиръ для ширшого загалу руського учительства такъ мужеского, якъ женскаго. Зазначити бы и се, что участники духовныхъ вправъ разумѣючи погубнѣ наслѣдки нещасної схизмы изъ властної іниціативи повзяли замѣръ розвинутї живу уніонистичну акцію въ доступныхъ для себе кругахъ и подъ проводомъ св. Іосафата служити высокой идеѣ з'единення Церквей. Счасти Боже сему св. намѣренію!

НОВОСТИ

Отпустъ въ Дравцяхъ. Дня 21-го септембра въ середу на праздникъ „Рождества Преч. Д. Марії“ одбывся отпустъ въ Дравцяхъ. На сей отпустъ бывъ запрошеный Преосв. Владыка пряшевскій Павель Гайдичъ, бо нашъ Преосв. Петро поѣхавъ на отпустъ до своего родного села, Кальника. Побожнѣ вѣрники появилися въ великомъ числѣ въ Дравцяхъ, чтобы подкрѣпiti себѣ въ любви Найсолодшого Сердця Іисуса Христа при заступництвѣ Преч. Дѣвы Марії. Преосв. Павель приѣхавъ до Дравецъ на автѣ въ супроводѣ о. каноника Карцубъ Андрея, о. Седлака, проф. пряшевской богословії и еромонаха о. Калинця. Перший разъ привитавъ Преосв. Павла о. Когутичъ, окр. намѣстникъ, о. Пайкошій дух. дравецкій и староста села. И такъ цѣлый походъ рушився середъ спѣву до церкви. У церковныхъ дверяхъ маленька ученица передала Преосвященному гарный букетъ цвѣтовъ и привитала его слѣдуючимъ краснымъ стихомъ:

Витай у насъ, владыко милый,
Владарю руськихъ душъ, — сердецъ!
Мы въ нашихъ сердцахъ запалили
Подяки вѣчный каганецъ.

За твою працю драгоцѣнну,
За ласку, за святу любовь,
Одъ твоихъ вѣрныхъ у замѣну
Ты маешь сердця за рабовъ:

Ты любишъ насъ, зато приходишъ
До нашего гнѣзда малого;
Ты любишъ тысячъ, но самъ лишь,
А тысячъ тебе самого!

А ще треба ми сказати, —
Якъ любять тебе дѣточки;
Но мовчаньемъ дадуть ти знати
Сесь смиреннѣ квѣточки.

Потомъ Преосв. Павель посвятивъ церковный прапоръ Найсв. Сердця Іисуса Христа и въ 10-ой год. зачавъ торжественну Литургію. Наказъ держали о. Когутичъ намѣстникъ окр. и о. Е. Бокшай проф. рел., а по Службѣ Божої Преосв. Павло самъ державъ наказъ: „О любови Найс. Сердця І. Христа“ и поучивъ Русиновъ ожъ якъ треба любити Сердце Спасителя, aby мы одъ него были любленѣ. По про-

повѣди Преосв. Павла бывъ обходъ около церкви зъ Найсв. Тайною Евхаристією, де побожнѣ Русины на благословеніе Его Преосв. зъ Тайною Евхаристією побожно поставали на колѣна, чтобы отдать честь Найсолодшому Сердцю Іисуса Христа за его невысказанну любовь и перепросити Его за всѣ зневаги и кривды, котрѣ Оно достає одъ всѣхъ нехристіянъ и схизматиковъ. Подчасъ обходу всѣ люде спѣвали прекраснѣ пѣснѣ до Найс. Сердця І. Христа. По обходѣ Преосв. Владыка одкончивъ молебень, надѣливъ вѣрниковъ повнымъ отпустомъ и народъ вернувшись до дому въ повной надѣї и любови Найсв. Сердця І. Христа. За сей великий моральныи успѣхъ и незданое досѣ побожному Русинови почитаніе Найс. Сердця Іисуса Христа велику заслугу мае о. Пайкошій мѣстный парохъ. Трудами о. Пайкошія въ Дравцяхъ розширилося почитаніе Найс. Сердця Іис. Христа и сесе товариство мае даже много членовъ. Шкода, что на Подк. Руси не знаютъ о семъ жерель любви, а то напевно не было бы туй шизмы! А вы побожнѣ Русины просьть вашихъ священниковъ, абы они закладали побожнѣ товариства, бо мы Русины потребуемъ много помочи одъ Бога, якъ въ духовномъ, такъ и въ супольномъ житю. Въ 5-ой год. Его Преосв. Павло одѣхавъ до Пряшева. Многая и благая лѣта ему!

Присутній.

НАВЕРНЕНЯ О. ВОЙТОВИЧА. Благовѣстникъ не згадавъ про смутну подѣю одступництва о. Войтовича, кто повдруга рока тому, якъ перешовъ на схизму. Онъ бывъ священникомъ воинсковымъ изъ епархіѣ Пряшовскої. Не згадовали мы про се, бо не утратили надѣю, что о. Войтовичъ не довго зостане межи схизматиками. Голосъ совѣсти можно на оденъ часъ занѣмити, але вырвати изъ сердця нѣтъ. Такъ ся стало зъ о. Войтовичомъ. Онъ переконався и глубоко пересвѣдчився, что въ схизмѣ не е спасенія; видѣвъ, что то е лише политика, не е то Христова Церковь и вѣра, лише творъ гордого Фотія и зъ ширымъ показаніемъ вернувшись въ лоно христ. каѳолическої Церкви. Преосв. Павелъ епископъ его справу предложивъ св. Апостольскому престолу, просячи для него розрѣшеніе для дальншого дѣйствованія. Схизматики, у васъ еще все спить совѣсть?!

ПЕРЕДАЛИ ЦЕРКОВЬ ВЪ УБЛЪ. Дня 11-го септембра одбылося переданія церкви въ Ублѣ (Ж. Марам.) Изъ стороны епархіѣ выйшли Ив. Егрешій архид. и о. др. Луд. Миня копашанскій духовникъ, изъ стороны же администраціѣ др. Павелъ Коссей окр. начальникъ. Люде не то, что никусь не протестовали, но всѣ однодушно брали участъ въ Богослуженію, что одправивъ имъ др. Л. Миня. Церковь, — якъ всягде, где схизматики господарятъ, — была цѣлкомъ занедбана, знечищена, смѣтина такъ, что треба буде богато працѣ привести єї до порядку. Церковь была однята еще года 1919., але благородный (нямешскій) народъ Ублянскій, не могъ дальше терпѣти иго батюшковское и рѣшительно оставивъ блудъ и ересь. Такъ честнѣ жителѣ Ублѣ стали взорцевымъ примѣромъ для тыхъ не много селъ, где народъ еще все не пробудивъ и вѣруе вовкамъ ходячимъ въ овечихъ кожахъ.

Схизма побѣджена безбожіемъ. Найвишій церк. соборъ россійскоѣ „правосл.“ Церкви въ Москвѣ выдавъ розказъ всѣмъ вѣрникамъ, чтобы не смѣли противлятися розпоряженіямъ „совѣтскоѣ“ власти. Кто грѣшить противъ (безбожныхъ) комунистовъ, той грѣшить и противъ (святоѣ) православноѣ Церкви. Кто повстае противъ совѣтовъ, повстае противъ Церкви и есть выключенный изъ товариства христіянъ. Ся клятва односиться и до тыхъ россіянъ, котрѣ находяться на заграницѣ. Въ наслѣдокъ сего колись славна православна, Церковь е цѣлковито потоптана поганскимъ комунізомъ и стала его рабынею. Пекельнѣ силы цѣлкомъ перемогли є. Ци може быти отже „православна“ Церковь Церко-

вію Христа, которой е пообѣцяно, что „врата адова не одолѣютъ ей“. (Маѳ. 16, 16)?

Выименованія. Преосв. Владыка выименовавъ Андрея Медвецкого, духовника въ В. Шардѣ за почестного намѣстника. Благожелаеме!

Изъ царства Антихриста. У комуністичной Россії люде убили звѣстного ката Гадлевскаго, кто подъ протягомъ 5 лѣтъ застрѣливъ (изъ заду въ голову) 8.000 людей. Красный то комуністичный рядъ, где лишь такимъ чиномъ можно удержати порядокъ. Най живе свобода!

Наверненія японцовъ. Японскій посолъ въ Лондонѣ: Матсуѣ перейшовъ на католицку вѣру. Разомъ зъ нимъ приняло катол. вѣру много японскихъ студентовъ и оденъ професор.

ПЕРЕПИСКА РЕДАКЦІЇ

Житя св. Терезіѣ въ слѣдуючомъ числѣ продовжаеме.

М. Козикъ Гукл. Дѣло поговорѣть зъ адвокатомъ и клеветниковъ заправо-тѣть. Треба ихъ научити на честь.

Надѣя. Римъ. На жаль мусиме туй-тамъ исправити правопись; се пожадають тутешнѣ обставины. Благов. е такожъ органомъ Ап. Молитви. Житъепись Х. Пія чекаеме. Лѣнише любиме короткѣ статѣ. Апробаты для такихъ рѣчей не треба.

Нашъ Календарь „БЛАГОВѢСТИКА“ уже печатаєся. Буде дуже гарный змѣстомъ и буде мати много образковъ. Цѣна 5 Кч. Просиме вздержатися зъ закупномъ Календаря, а пождати на нашъ Календарь.

Вже вийшовъ молитвословъ „Да святиться Имя Твоє“, словацкими буквами для дѣтей не знаючихъ читати по рульки.
Замовляти можна сейчасъ: Выдавництво Чина св. Василія В. въ Ужгородѣ.
Цѣна примѣрника 4 Кч. **Содержаніе яко въ русскомъ изданію.**